

SHAURLI: “AE NESTRE REGJON AL E’ STÂT DÂT IL BON ACET TAL PLUI IMPUARTANT ORGANISIM EUROPEAN PES MINORANCIS LINGUISTICHIS”

La jentrade tal ‘Network to promote linguistic diversity’ e puartarà ocasions impuartantis par rivâ a vê acès ai fonts europeans

“Intune Europe che e à tant che sô sproc ‘*unîts te diviersitât*’, la Regjon Autonome Friûl Vignesie Julie e pues zuiâ un rûl fundamentâl in gracie de sô situazion linguistiche particulâr. Par chest al è un onôr par me ricevi, a non dal Consei regjonâl, il bon acet uficiâl tal ‘Network to promote linguistic diversity (NPLD)’, che si è caraterizât tant che la realtât europeane plui dinamiche e indenant te promoziun des minorancis linguistichis”. Cussì il conseîr regjonâl, Christiano Shaurli, cjâf grup dal PD, al à dit te Assemblee gjenerâl dal NPLD, che si è davuelte a Leeuwarden in Frisie (Olande) ai 5 di Jugn e che e à decretât la amission uficiâl de Regjon Friûl Vignesie Julie tal impuartant organisim internazionâl des minorancis.

Il Network al è une rêt europeane creade cul obietîf di sostignî, tutelâ e promovi lis lenghis minoritariis e che e met dongje passe trente istituzions publichis e privadis, e tra chestis i guviers de Irlande, de Catalogne, dal Paîs basc, dal Gales e de Frisie. La rêt, cofinanziade de Comission Europeane, e je une base operative tal setôr des lenghis regjonâls e minoritariis di dute Europe, par judâ il scambi di pratichis buinis e informazions e e inmanee svariâts events e grups di vore pe creazion di progjets di fâ adun tra i siei components.

“Ancje se si àn la ricjece linguistiche e la storie lungje di tutele des minorancis de nestre Regjon – al à spiegât Shaurli dongje dal event – al è ancjemò un grât di cognossince scjars de nestre realtât a nivel european, cussì cemût che e je une presince minime di rapresentants de nestre

Regjon tai difarents setôrs internazionâi che a lavorin te promoziun des lenghis minoritariis e dal multilinguism in gjenerâl. Par cheste reson o vin pensât che al fos cetant impuartant jemplâ chest vœit cu la nestre presince, che o riten un investment autentic par vie des oportunitâts che al pues dâ no dome sot dal profîl culturâl, ma ancje sot chel economic e turistic, cemût che e mostre la capacitât dai frisons di fâ ricognossi la lôr capitâl – grande plui o mancul tant che Udin – tant che Capitâl europeane de Culture tal 2018.”

Al compagneve il Conseîr Shaurli, Lorenzo Fabbro, President de ARLeF, che al sarà il braç operatîf de Regjon dentri tal organisim european. “No vin mai di dismenteâ – al à dit Fabbro – che il rispîet de diversitât linguistiche in Europe nol tocje dome lis 24 lenghis uficiâls de UE, ma ancje lis lenghis regionâls o minoritariis, che daûr dai dâts uficiâi de Comission europeane, a son une sessantine e a son feveladis di passe 50 milions di europeans. Za in cheste prime Assemblee, o vin podût capî i cetancj vantaçs che nus da il pluralism linguistic de nestre Regjon, pin di dut la pussibilitât di partecipâ adun cun chês altris minorancis a svariâts bants europeans”.